



CENTRALE BANK VAN ARUBA

Entrante 1 di mei 2023, BCA ta mantene e reserva obligatorio na 25,5 por ciento.

Relato di prensa


Conforme e tarea di e Comité di Maneho Monetario (CMM) pa evalua, determina y duna transparencia riba e accionnan di maneho monetario di Banco Central di Aruba (BCA), BCA ta comunica lo siguiente. Durante e reunion di 25 di april 2023, CMM a dicidi pa mantene e tasa di e reserva obligatorio na 25,5 por ciento entrante 1 di mei 2023. Di e manera aki, e banconan comercial mester tene un balansa minimo na BCA cu ta igual na 25,5 por ciento di e depositonan riba termino cortico di nan clientenan. E decision pa mantene e reserva obligatorio na 25,5 por ciento ta basa primordialmente riba un caida den e estimacion di likides excesivo di e sector bancario comercial na fin di maart 2023 compara cu december 2022. BCA ta sigui monitoreo e desaroyo den e likides excesivo y lo por dicidi di cambia e tasa di reserva obligatorio, si ta considera esaki necesario.

E CMM a considera e siguiente informacion y analisis den su deliberacion.

Reservanan internacional y oficial

E reservanan internacional, cu ta consisti di reservanan oficial di BCA y reservanan di divisa na e banconan comercial, a baha cu Afl. 149,4 miyon te cu 31 di maart 2023, compara cu fin di december 2022 (Grafico 1). E reservanan oficial a mengua cu Afl. 40,1 miyon, mientras cu e reservanan na banconan comercial a disminui cu Afl. 109,3 miyon. Consecuentemente, te cu 31 di maart 2023, e reservanan oficial y internacional a suma Afl. 2.750,8 miyon y Afl. 3.091,9 miyon, respectivamente.

Mantencion di un nivel adecua di reservanan ta esencial pa mantene e tasa di cambio fiho entre e florin Arubano y e dollar Mericano. Teniendo cuenta cu esaki, apesar di e caida menciona anteriormente, reservanan internacional a keda ampliamente riba e rekisito di tres luna di pago riba e cuenta coriente di e balansa di pago den maart 2023. E pagonan riba e cuenta coriente di e balansa di pago ta consisti, entre otro, di pagonan pa importacion, pagonan di interes na inversionistanan stranhero y transferencianan pa exterior manera placa manda afo door di trahadonan stranhero. Reservanan oficial tambe a keda dentro di e margen aceptabel basa riba e metrico 'Assessing Reserve Adequacy' (ARA) di e Fondo Monetario Internacional (FMI) (Tabel 1).



Tabel 1: Metriconan relata na reserbanan observa den 2023

	jan	feb	mar
Cobertura estima di pagonan riba cuenta coriente ¹	7,1	6,9	6,7
Metriko estima di FMI ARA ²	107,7	106,4	109,6

¹ E cantidad di luna di pagonan riba cuenta coriente cu e reserbanan internacional ta cubri.

² E proporcion entre e nivel di reserbanan oficial y e nivel minimo adecua (conforme FMI), den porcientonan.


Inflacion

Inflacion, midi na final di luna contra e luna di e aña anterior, a yega 7,1 por ciento den februari 2023 (januari 2023: 6,6 por ciento) (Grafico 2). E aumento den e Indice di Prijs di Consumo (IPC) na februari 2023 compara cu februari 2022 tabata causa door di e crecimiento den prijs di utilidad, cu a sigui afecta e componente di ‘vivienda’ (contribuyendo cu 3,1 punto di porcentahe). Tambe e prijs di gasoline y prijs pa compra di vehiculonan a subi, impactando e componente di ‘transporte’ (contribuyendo cu 1,6 punto di porcentahe), mientras prijs di e componente ‘cuminda y bebida no alcoholico’ tambe a aumenta (contribuyendo cu 1,3 punto di porcentahe).

E inflacion midi riba promedio di 12 luna a subi te na 6,1 por ciento na februari 2023, compara cu 5,8 por ciento na januari 2023. E presion inflacionario tabata debi na e nivel eleva di prijs di petroleo riba mercadonan internacional y e aumento den prijs di awa y coriente desde augustus 2022. Ademas, Aruba a importa un gran parti di e aumento den prijs for di su partnernan comercial, particularmente Estados Unidos y Europa.

Mientrastanto, na februari 2023, inflacion basico (excluyendo cuminda y energia) a alcanza 3,0 por ciento (januari 2023: 2,5 por ciento) si midi e final di respectivo luna contra e mes un luna di e aña anterior. Basa riba un promedio di e ultimo 12 lunanan, inflacion basico a yega na 2,4 por ciento (januari 2023: 2,3 por ciento).


Grafico 2. Inflacion basa riba e indice di prijs di consumo
(Fuente: CBS, februari 2023)



Likides excesivo di banconan comercial

E total di likides excesivo di e banconan comercial a desminui di Afl. 819,7 miyon na december 2022 te na Afl. 725,3 miyon na februari 2023, continuando riba e tendencia di bahada observa durante 2022 (Grafico 3). Ademas, estimacion preliminar di e likides excesivo na maart 2023 a indica un caida adicional di Afl. 69,2 miyon compara cu februari 2023. Sinembargo, likides excesivo a permanece riba e nivel estima (+Afl. 354,3 miyon) cu e banconan comercial posibelmente ta desea di mantene como un refuerso di likides adicional.

Grafico 3: Likides excesivo di banconan comercial
(Fuente: CBA)



Banco Central di Aruba
9 di mei 2023